

## Viefenzeuventug joar voetbal

Twee wèk'n geleej'n ging bienoa onop e-merkt de vlag in top: ons mooie voetbalklupjen beston op 1 september precies viefenzeuventug joar. Nee, ik binnen gin lid van ut eerste uur, doar bin'k nog völ te jong veur, um eerluk te wèz'n bin'k helemoal gin lid meer, moar ik ben d'r weh trots op ruum viefentwintug joar deel uut e-maakt te hebb'n van dat mooie klupjen. Ik zee-j mie as klein keerltje nog zo noar ut kluphuus an de Wijtenhorst riej'n. Oaver de Kolkmansweg woar later ok ut kluphuus van de handbal kwam, oaver de zandweg langus de kolk en dan zo met mien fietsjen de pakeerplaatse op, vol met kuul'n en gaat'n. As ut had e-règent ha'j de poot'n ah zeiknat veurda-j de fietse had weg e-zet. A-j van schoole kwam, liep ie altied eff'n langs de kerke umdat doar stond an e-plakt woar en hoelate ie dee-j zoaterdag mos voetball'n. Mien moa gaf mie altied un paar guld'n met veur un koolaatje, o nee, ik dronke spa gruun – want ie mot goed drink'n jonge – en un paar dropsleutels veur un duppie stuk. Nee, ik binne noajt vedder e-komm'n dan de kneuz'ntiems, spöld'n legendariese wedstried'n teeg'n Roda, Daventria en Labor en met ons viefenzeuventug joarig bestoan hebbe wie ze allemoale oaverlèft. Ach en zo hef iederene zien eigen herinneringen an de Schalkhaarse trots. Ut is natuurluk ok un katsgekke klup. Wie herinnert zig nit ut wereldrekort kroep'n, un moader die heur kind huuln'd uut de wedstried haald'n. Wie kan zig nit meer die joarlukse veiling'n herinner'n onder leiding van Jan Coobs, de Theo Koomen van ons dörp? En zo kan ik d'r nog wat meer opnuum'n. Wie hef d'r nog un eksemplaar van de skommelstoalaktie, wie hef d'r allemoal met e-doan an Theo Hagen-loop? Of wie kent de Z-side nog en de pleebekshoos woar de Bimbam-ekt zien ontstoan hef? En wie kent nog ut Willem Brinkman Toernooi, genuumd noar ons markante lid dat tiedens de joarvegaadering'n altied ut laatste woord mos hebb'n? Ut viefentug joarug jubileejum met un heuse feestwèke. Allemoal trugblikk'n uut vevloog'n tied'n, A'k mien oog'n sluute trekt d'r zovölle mooie herinnering'n veurbie da'k d'r nog weh honderd van disse stukkies mee kan vull'n. Viefenzeuventug joar en deur de omstandugheed'n zit d'r nit völle meer in dan de vlag in top te stèk'n en moar un hééééél klein feesj'n te vier'n. Van harte filleseteert Schalkhaar en oaver viefentwintug joar goa wie d'r un fantasties eeuwfees van maak'n. Ik hoape da'k ut mag belèv'n!

Driek van de Oerdiek